

Plenchi

Bèl a bati

Bèlèm bèlèm. Ata nos atrobe riba plenchi ta wardabu ku alegria.

TRINGG TRINGGG bèlèm..... TRINGG TRINGGG bèlèm.....

Siman pasá tabata wikènt di Curadoet. Esta bunita proyekto. Masha hopi hende a laga nan mes kosnan para, pa nan duna un man na otro.

Diferente skol di nos a haña un facelift tremendo. Danki na tur boluntario, tur sponsor, tur ku a sostené di un manera of otro pa e trabounan a kana bon. Dios bendishoná kada un ku a duna nan aporte. Asina nos ta biba nos identidat katóliko. Dor di kompartí nos tempu yudando otronan. Danki na e motornan inkansabel tras di CuraDoet. Danki tambe na FOL i Konsul Merikano pa e donashon di 913 tas di skol pa nos muchanan di Korsou den enseñansa di fundeshi. Un kontribushon bunita pa asina otro aña eskolar diferente alumno ta sigurá di un bunita tas.

E siman aki bo por tuma un tiki rust, bai telebishon, skucha bo musika preferí. Lesa un buki of dal un duik den laman. Ta kuaresma, tempu pa reflekshoná i apstené. Un felis wikènt pa bo.

Riba roster

E alumnonan /koleganan di tempu di LTS Technisch College St. Jozef sigur ta kòrda e imágen aki hasi pa e.o. nos èks dosente di CAV (q.e.p.d.) Virgilio ‘Torro’ mr. Brion.

Despues ku Technisch College i Andreas College a bira 1, e kaya mei mei di e dos skolnan pa yega COLON aki a dispersé i a traha nos lokalnan CAV (2009) nobo e imágennan aki a dispersé! Pero tempu a konserva nan! E logo di VSBO St. Jozef i e imágen di patrono di NOS VSBO St. Jozef (St. Jozef).

Pero riba djasabra 10 di mart 2018 (9 dia promé ku e fiesta di St. Jozef – patrono di nos skol)

durante Curadoet 2018 a bolbe aparesé pa nos gosa di dje! - Rumbo pa 90 aña VSBO St. Jozef (2021). Wij zijn trots, er is toekomst!

Un danki ta bai na tur boluntario, alumno i trahadónan di VSBO St. Jozef pa nan aporte!

Nos a focus riba 5 diferente lokalidat den skol, pero na final nos a logra hasi trabou na 6 diferente lokalidat den skol.

1. 'Touch-up' gang lokal C1 te ku C4.
2. Limpia parti patras di lokalnan 13, 14 i CAV.
3. Ferf parti patras di lokalnan 5 te ku 9.
4. Sera e espasionan habri tras di tribuna vèlt ariba.
5. Limpia parti pafó di skol na COLON i fèrf porta i muraya ku bista pa COLON.
6. 'Touch-up' trapi i aula pa St. Jozef (heights) – inisiativa riba e dia i na e momento di nos direktor athuntu juffr. Lourens-Poulo.

Pues nos por bisa 'SI' nos a logra. Wij zijn 'TROTS', er is TOEKOMST!



Den agènda

Liber di skol:

Mart dia 26 pa aprel dia 4 Pasku Grandi.

Liber nashonal:

Mart dia 30 Bierne Santu

Aprel dia 2 Dos dia di Pasku Grandi.

Riba rapòrt

Radulphus College a bai Curadoet na Kolegio San Martin de Pores. E pòtretnan ta papia pa nan mes. Bunita gesto di un skol pa otro. Esaki ta muestra di nos identidat katólíko, yuda e otro ku amor. Danki Radulphus College.





Mi ta konta

Bicho su angel wardadó

“Ban mira, Bicho. Kos p’awe sí. Sino bo mes mira kon bo ta hasi yega skol.” Tur dia ta mes un fregantina ku Bicho. Nunka e no ta kaba na ora pa papai hib’è skol promé ku tráfiiko pega na Santa Rosaweg. Si no ta un buki Bicho a pèrdè, ta kachó a kue su mea òf ta su tèrnu a plama den tas di skol.

Sintá eifó den su trùk segunda mano, Papai ta pita sin pasenshi. Tur dia meskos. Algun mucha den barío ku ta bai e mésun skol ku Bicho, sa ku ta miedu di bai skol e tin. Nan ta hari tur mainta ora e esena ripití. Gurshwin

tambe. Especialmente Gurshwin. E mes Gurshwin ku ta hasi chèrchè di Bicho tur santu dia den klas.

Asina mener bisa ku Bicho a hasi un bon trabou, e koro dirihí pa Gurshwin ta murmurá patras den klas: “Chifladó, suku di su mama ...” Dia pa dia e palabranan ta bira mas malisioso i mas mucha ta partisipá.

Un djaluna mainta Bicho a disidí ku e no ta bai skol mas. Bon iritá papai a zuai habri su port’i kamber. “Ki falta, Bicho? Ki mishi bo na pidjama ainda? Ban mira, lant’ ariba.” Bicho no sa papia kos di konfiansa ku su tata. Pero el a sinti ku e no tin nada di pèrdè mas. Ku luho di detaye el a konta papai tur kos. E pèstermentu. E manera ku Gurshwin i su trupa di amigu ta ridikulis’è ora e skor bon.

A kai un silencio den kamber. Straño. Bicho a ferwagt papai bis’è p’e stret su lomba, wanta duru, i stòp di hasi ko’i mucha chikitu. Logá papai a konta ku ántes el a pasa den e mésun situashon. Bicho a keda babuká. “Kiko papai tabata hasi ora nan kuminsá pester?” Papai a sakudí kabes. Nada partikular. Mi tabata djis pidi mi angel wardadó bin kompañá mi. P’esei nunca nan palabranan no a dal mi duru. Despues di poko tempu mi no tabata wòri mes ku e ko’i kèns nan ku nan ta papia. Na un dado momentu nan mes a fada i e pèstermentu a bin stòp.” Bicho a puntra: “Mi tambe tin un angel wardadó?” “Tur hende tin,” papai a kontestá. “Ta abo mester dun’è un lugá stèdi den bo bida.”

Un preñchi

Kolegio Annie Koenraad a sera e tema:Papiamentu `mi lenga materna`
Muchanan K Annie K ta kampion



Mucha djispou

Jerry: "Tica kon ta bisa nanishi na ingles"

Tica: "Nose"

Jerry: No se tampoko ta kon."

